

todo en la medida en que a través de ellas, en un mundo como el nuestro hoy tan globalizado, un colectivo de seres –el romance– puede sentirse cohesionado por una determinada visión del mundo.

ROSA MARÍA MEDINA GRANDA

Rafael Cano (coordinador), *Historia de la lengua española*, Barcelona (Ariel), 2004, 1167 págs.

Maria Teresa Echenique Elizondo y Juan Sánchez Méndez, *Las lenguas de un reino*, Madrid (Gredos), 2005, 536 págs.

Nos últimos años son delles les publicaciones dedicaes n'España a revisar el discursu histórico-filolóxicu sobre la llengua y, nel so casu, incardinánde otru paralelu sobre la glotodiversidá del país. Les causes d'esti xorecer son seguramente munches: dende una sana y necesaria actualización de los datos y l'enfoque científicu hasta l'interés por dar respuesta, dende l'ámbitu académicu, al vivu debat presente na sociedá española al rodiu de la pluralidá d'identidaes culturales y llingüísticas que conviven nel estáu y el so tratamientu políticu más actionáu.

Dos de les más recientes d'ente estes publicaciones son les dos que reseñamos agora, dambes con voluntá espresa de volvese manuales universitarios de referencia. De cuillá de la valoración xeneral d'estes obres, en cuantes que fontes bien estimables d'información actualizada sobre la filoloxía hispánica en xeneral, permítiréme enfocar estos llinies dende'l punto de vista del tratamientu del que, más específicamente, ye oxetu l'asturianu, en cuantes que muestra significativa de la consideranza que na filoloxía hispánica más actual merez, cuando la llengua asturiana como tala, cuando los estudios llingüísticos asturianistes.

La *Historia de la lengua española* coordinada por Rafael Cano Aguilar ye un impresionante manual de 1167 páxines que naz col envís, bien declaráu na presentación, d'asumir el papel referencial que nel estudiu de la historia llingüística del castellán tuvo nel últimu mediu sieglu la obra homónima de Rafael Lapesa. A esa empresa xuntáronse hasta cuarenta y dos autores españoles y estranxeros especialistes nes distintes dómines históricos consideraes, cuando n'historia social o en diacronía llingüística, cuando en normativización, sociollingüística, dialectoloxía y contactu de llengües. La propia diversidá d'autores determina un nivel desigual en cuantes a la calidá de les distintes partes (dientro d'un más qu'es-

timable altor mediu) pero tamién una sana diversidá de perspectives que, en tou casu, son a caltenese a lo llargo del volume dientro de los calces esixibles a un discursu de calter rigorosamente científicu, fechu que, non por obviu, tien que dexar d'aponderase.

Como dixi, desque asumíu esi valir referencial que, efectivamente, ta moviu a algamar esti trabayu nos estudios filolóxicos hispánicos nesti naciente sieglu (y de cullá de cuestiones puntuales sobre les que, evidentemente, el discutiniu sigue abierto), quixería enfocar esta reseña dende'l puntu de vista del interés que'l llibru pudiera tener pa los estudios d'asturianu, en cuantes que fonte d'información interesante, pero, sobremanera, como sida pa la reflexón sobre la filoxia asturiana actual.

Puede resalvase decir que (anque empuestos al estudiu específicu del castellán) el conxuntu de capítulos que se dediquen al procesu constitutivu del proto-romance hispánicu (les cuatro primeres partes, dedicaes a les llingües prerromances o al llatín hispánico) resulten en bona parte d'inmediata aplicación al asturianu, mesmo qu'al conxuntu de romances peninsulares. Referencies más concretas, anque siempre puntuales, al asturiano-leonés empiecen surdir nesta cuarta parte, sobremanera nel capítulo 10 (páxs. 257-290) firmáu por José Jesús de Bustos Tovar, una visión rigorosa y actualizada sobre la xénesis de los romances hispánicos na que, contra'l criteriu de Penny, y na llinia de Frago, l'autor caltién una visión en positivu sobre la personalidá definida del nuesu dominiu, nel que l'incipiente romance de los sieglos x-xi yá topaba na ciudá de Lleón un focu de normalización yá irradiación que tiraba a xenerar «un romance autóctono con diferencias no sólo fonéticas sino también léxicas» (páx. 277).

Sicasí, la parte del lleón (y nunca mejor dicho) del tratamientu del asturiano-leonés nesta obra faila'l capítulo ventiún (*Del leonés al castellano*, páxs. 555-570) na que José Ramón Morala analiza la evolución llingüística de los testos escritos lleoneses (*sensu stricto*: al sur del Cordal) ente los sieglos XIII y XVI, reparando igual nel surdimientu inicial de rasgos definitorios del nuesu romance que na progresiva castellanización de les distintes soluciones y, destacando, en tou casu, la complexidá del procesu y la so distinta intensidá según zones; fechu que tendría, otra manera, daqué paralelismu cola situación llingüística actual, que, como tollo referente al asturianu d'Asturies, nun ye oxetu de tratamientu nengún.

Otra manera, referencies de revisgu al surdimientu escrito del romance asturiano-leonés aprucieren tamién en capítulo sobre la normativización llingüística d'Alfonso X, d'Inés Fernández Ordóñez (páxs. 381-422), qu'análiza entientes l'afita-

mientru del castellán como llingua de la cancillería real en sieglu XIII, pero tamién el remanecer del lleonés na documentación notarial coetania, a resultes, d'acordies cola autora, d'una imitación del vezu d'escribir romance entamáu primero nes escribaníes castellanes. Ello vendría probalo la distinta cronoloxía d'usu escritu del lleonés d'acordies cola mayor o menor proximidá xeográfica de les distintes escribaníes lleoneses a Castiella (pax. 383, nota 6).

En della midida, el tema del lleonés remanez nesta obra nel capítulo dedicáu a *Los lenguajes especiales y de las minorías en el Siglo de Oro* (páxs. 771-798) por Antonio Salvador Plans, nel que se vuelve sobre la cuestión del *sayagues* (páxs. 781-786) y la *fabla antigua* (páxs. 786-791) col envís d'ofrecer un estáu de la cuestión sobre estos rexisztos, de primeres lliterarios, pero non quitos de remisiones a la tradición llingüística asturiano-lleonesa, como fexo mui bien notar (nun estudiu non citáu pol autor) María Josefa Canellada. Échase tamién de falta, dende'l nuesu punto de vista, una cierta consideranza a la llingua característica de los *villancicos d'asturianos* del sieglu XVII, non solo pol so pesu cuantitativu na lliteratura popular española de la dómina, sinón pola esistencia d'una yá bultable bibliografía especializada, como la debida a José Luis Pensado, Xosé Lluís García Arias o Xuan Carlos Busto, ente otros.

Fora de lo dicho, l'asturiano-lleonesa nun vuelve ser oxetu de tratamiento nin a cuenta de la variación sociollingüística y dialectal actual n'España (páxs. 973-1010) nin del análisis del contactu llingüístico del español con otros llingües peninsulares (páxs. 1065-1117). Ello quier dicir que l'asturianu como talu nun asoma nenguri a lo llargo del llibrus, lo que contrasta col xenerosu tratamientu que, a la so manera, sí recibiera na clásica *Historia de la lengua española* de Lapesa. Entá conscientes de que lo que se quier entamar nel volume consideráu ye una historia llingüística del castellán (y que polo tanto la esclusión del asturianu ende ye un fechu estrictamente coherent y, de so, non criticable, y hasta estimable) esta visible mengua na atención a la nuesa realidá llingüística entendemos que tamién merez algúñ tipu de reflexón, sobremanera cuando'l conocimientu del asturianu guri disponible nes bibliografíes ye notablemente superior al que pudo contar nel so momentu don Rafael. Quiera considerase un *dialectu* del castellán o una llingua estremada d'él (y en contactu con él) contamos nun cayer en llamientos patrioteros banales a la de defender qu'una mayor atención a la llingüística asturiana arriquecería en daqué midida esti, de so, pervaliosu trabayu.

Esti problema nun se da, otramente, na otra de les obres reseñaes. *Las lenguas de un reino*. El trabayu d'Echenique (collaboradora del volume anterior) y

Sánchez Méndez respuende, per otru siriu, a ún de los enfotos apuntaos a lo primero, lliteralmente «el impulso para escribir este libro ha nacido de la constatación de esta necesidad imperiosa, a saber, la de proporcionar una base filológica suficiente para llegar a conocer y comprender, en toda su complejidad, el proceso histórico que ha conducido a la situación de las lenguas en la España de hoy, con el fin de ofrecer un fundamento a las diferentes visiones y actitudes que, lógicamente, tendrán que convivir en el marco social y político actual» (páx. 12), por cuantes que «la diversidad lingüística de España, al margen de opiniones y juicios de toda índole que haya generado en el transcurrir de los siglos, así como en el propio discurso histórico, se puede contemplar de manera desapasionada como una rica y multifacética herencia del pasado, un legado que afecta individual o parcialmente en determinados casos, pero tiene siempre implicaciones colectivas e integradoras en su conjunto» (páx. 28).

Con esti encontu, el llibru defínese, dende'l mesmu títulu, como una *historia lingüística hispánica* al sen más convencional, anque dexando qu'el castellán comparta protagonismu, d'una manera por dicir equitativa, coles otres llingües peninsulares presentes o pasaes. De toes elles (incluyendo ente les d'anguaño les oficiales, más l'aranés, aragonés y asturianu) apúrrese una descripción idiomática sumaria, llindes esternes y división dialectal interna, unes rápides notes de tipu sociollingüísticu, testos de tipu llegal y normativu actual, una esbilla de testos y referencies bibliográfiques y de páxines web. El resultáu ye una digna visión de conxuntu sobre la realidá llinguística española, dende una intención por dicir *politicamente correcta* y, de primeres, abierta abondo en cuantes que-y dexa al lector ciertu clariente a la de formase'l so propiu criteriu.

Nel casu específico del asturianu, anque oxetu d'ampliu repás (páxs. 353-415), el so tratamientu participa de l'ambigüedad típica na filoloxía hispánica más convencional: per una parte, quítase espresamente d'ente'l conxuntu de dialectos del castellán (lo que tien un puntu de novedá) pero, per otra, sigue ensin ser una llingua *normal* porque «no contamos en su área lingüística con ninguna lengua, sino con un conjunto de variedades romances muy próximas y con una historia común, que perpetúan la tradicional diversidad lingüística de la región desde tiempos remotos, a la que se superpuso el castellano/español, como única lengua común a todos» (páx. 353). A esa cosa llámase-y con toa naturalidá col términu adventiciu de *bables* (carente d'usu popular y tradición culta, pero bendiciu en llibru col hisopu d'una supuesta normalidá nominal que nun tien nin tuvo nunca) mientres qu'el glotónimu histórico de *asturianu* resulta surdir de «un intento

moderno de crear una lengua unificada y estandarizada por parte de la Academia de la Llingua Asturiana» (páx. 354).

El discursu históricu que s'adobana por esplicar esti estáu de coses *ab ovo* presenta una falta d'actualización visible, recurriendo a los tópicos de rutina nesti tipo de visiones: l'indixenismu irredentu que caltién aisllaos microespacios tribales dende la Edá del Bronce (cuando los pueblos más conocíos, según los autores, «junto con los celtas, son los astures», páx. 358), romanización superficial que per un *situ* consagra eses mesmes divisiones ancestrales na so acción administrativa pero que ye incapaz de cohexionar un territoriu que, sicasí (y sorprendentemente, visto lo visto), llatiniza dafechu, etc... Por cierto que de los pocos centros urbanos referenciales que se citen, xunto a Astorga, taría la supuesta capital de los ástures del norte, *Lucus Asturum* que los autores identifiquen con total falta de precuru con Uviéu, ignorando otra manera la importancia central del Xixón románu nel territoriu asturianu y na so articulación social y administrativa, bien puesta a valir pola investigación histórica de los últimos venti años.

Yá na Edá Media, tendremos visigotismu inmutable y alta montaña, arriendes d'una importancia mínima de la estructuración del espaciu entamada pola monarquía asturiano-lleonesa, la poderosa ilesia medieval, los señoríos, etc... una y bones la población siguía aportunando, como nos tres mil años anteriores, con «un tipo de vida localista» que «hizo que cada zona y su habla siguieran un desarrollo ajeno a las demás, sin que ninguna ostentara razones de supremacía, y sin un centro rector con prestigio continuado» (páx. 366). Estes *zones* foron aína y felicemente redimíes pol romance castellán «mucho más innovador», con presencia «tan temprana que los documentos medievales irán siempre en la lengua de Castilla, convertida pronto en la única realidad escrita y modelo culto de habla, subordinando los distintos bables al papel de registros puramente orales, de la comunicación familiar y coloquial en contextos no formales» (páx. 376), afirmación qu'entra en contradicción colo dicho poques páxines enantes y col mínimu rigor esixible a un trabayu d'esta entidá (¿Cuántos rasgos definitorios del romance castellán atopen los autores nos milenta diplomes asturianos anteriores al segundu terciu del sieglu XIV?, ¿a qué obedecerá'l cambiú que se detecta nestos años? La Tesis Doctoral de Rafael Lapesa, de 1930 y reeditada de recién, yá daba delles pistes interesantes sobre'l particular).

Ellí ye que, d'acordies colos autores (y en contradicción cola mio biografía y dalguna bibliografía más ilustre), dende'l sieglu XVI les ciudaes «se castellanizaron completamente», y poco importa que l'aristócrata urbanita Gaspar Mel-

chor de Xovellanos declarara que l'asturianu yera la so llingua materna (o qu'afirmara terminantemente la so unidá, y promoviera'l so estudiu y la creación literaria) pa que los bables siguieren daquella esbalxaos per montes y valles ente families llabradorres analfabetes, hasta que, depués d'una riestra d'eruditos románticos nel XIX y un poco de lliteratura costumista llegáremos hasta los años setenta del sieglu XX nos que «se calcula que un 30 % de la población, esencialmente rural, mantenía todavía sus bables, aunque sin ningún prestigio y en decadencia progresiva» (páx. 378). Pero como'l lector nun sabe per *Las lenguas de un reino* quién lo calcula, cómo, nin por qué, tien perfectu derechu a dudar del datu: en tou casu podrá disponer d'interesantes, amplies y profesionales encuestes de los años 1980, 1991 y 2003 nes que (entá nun reflexándose na bibliografía aquí remanada, nin apurriendo un panorama muncho más soleyeru) podrá tener una visión un poco más completa y matizada, non solo del espaciu rural si-nón tamién del urbanu, y non sólo del usu efectivu sinón de la percepción ideolóxica de la llingua.

El repás históricu termina con referencies a la moderna normativización académica y la *creación* de la llingua asturiana por parte de, valga la paradoxa, los *defensores de los bables*, y con un resúme del marcu sociolóxicu actual y l'alderique sobre la cuestión llingüística dende una aparente neutralidá. El capítulu complementase con una descripción llingüística (fonética y fonoloxía, morfosintaxis —que ye morfosintaxis más fonética— y léxicu), una caracterización dialectal d'Asturies y Lleón, unes rápides notes sobre *El español de los asturianos*, bibliografía (na que se cita una revista conocida como *Letras Asturianas*, que l'interesáu nun podrá afayar en nengún catálogu), testos ilegales y muestres llingüístiques antiguës y modernes.

Anque consciente del calter necesariamente sintéticu y (ensin inclín peyorativu nengún nesti términu) de manual divulgativu d'esta obra, la visión presuntamente actualizada del asturianu que se da en *Las lenguas de un reino* ye fondamente decepcionante. Y, francamente, esta afirmación de mio nun responde a una discrepancia de tipu ideolóxicu colo que puede ser la llinia argumental de los autores: de primeres, porque, de seguir al pie de la lletra lo dicho na introducción del llibru, esa discrepancia nun ye sustancial (o, simplemente, nun ye) y porque, anque fora, habría ser irrelevante cuando de lo que se fala ye d'un trabayu de naturaleza científica que namá mira a ufiertar datos descriptivos sobre una determinada realidá. Simplemente cuento qu'esta descripción ye manifiestamente incompleta y, arriendes d'ello, yelo innecesariamente, cuando anguaño l'investiga-

dor cuenta con un ampliu repertoriu de fontes a la so disposición que, amás de datos relevantes que nun se consideraron nesti trabayu, dexaría probablemente a los autores adoptar una perspectiva crítica propia, más acionada al so propósitu maniestu que la inspirada pola *auctoritas* de referencia.

Por faese una idea de lo que digo: el llector mínimamente duechu nestos asuntos de la filoloxía asturiana nun tardará en decatase que tol discursu central d'Echenique y Sánchez sigue casi lliteralmente l'avanzáu por Jesús Neira de 1976, citáu na bibliografía. La citación, tamién, d'otres fontes (cuando realmente apurren daqué nuevo a lo dicho daquella por Neira) nun paez que tenga traducción nel testu con un aporte significativu de datos o col amiestu de perspectives alternatives (y nun entramos a si falten o sobreñen referencies). Poro, entá valorando en positivo *El bable: estructura e historia* (polo que supunxo nun momentu nel que s'echaba de falta una visión de conxuntu sobre l'asturianu) nun había cayer embaxo que, non solo pasó de magar un llargu trechu de trenta años, sinón qu'eso trenta años foron, probablemente los de más intensa producción investigadora sobre la nuesta realidá llingüística y los de más encesu debate sobre la mesma, polo que yera bonamente esixible qu'un trabayu como ésti que quier actualizar y dar una visión completa sobre l'asuntu tuviera en cuenta esa producción, anquequier criticando lo que fixera falta criticar y, poques gracies, dende'l prisma teóricu ya intelectual que llibremente escoyeran los autores. Simplemente eso nun se sexo y ye criticable como práctica académica, porque queriendo actualizar y completar, lo que se fai daveres ye clonar una percepción reveyida, incompleta cuando non falsa, y, polo tanto, entá es-puesta por demás al prexuiciu y al apriorismu, por bones que sian les intenciones de partida.

D'aínde resulta precisamente la visión distorsionada y distorsionadora de la llingua d'Asturies: la incontestable *realidá histórica* de los *bables* resulta ser (según el llibru) la mesma prefigurada dende'l discursu prenormalizador o antinormalizador, por cuantes se tapez toa llinia d'argumentación alternativa y la so fundamentación empírica. Con éses, poco importa que depués pretenda dase una panorámica más o menos aséptica del debate llingüístico actual cuando s'afita de mano'l supuestu de que les posiciones pro-normalización de la llingua carecen d'esi sofitu teóricu y surden pente los fumos de la Transición como una especie d'estravagancia mimética que mira *d'inventar* de la nada una norma pa los *bables*, a la que caprichosamente s'alquierden de llamar *asturianu*. De fechu, ensín dir más allá, yera abondo qu'Echenique y Sánchez echaren una güeyada a los propios trabayos de

campu de Neira en Llena¹ o Josefina Martínez n'Uviéu (por nun violentar les evidentes preferencies doctrinales de los autores) pa topar argumentos abondos pa cuestionar la exa central del discursu de *los bables* tan acriticamente asumiu.

Vémonos, en definitiva, ente dos obres ambicioses ya importantes (y, polo mesmo, valioses) tocantes al conocimientu cabal de la realidá llingüística peninsular, anque frustrantes si s'encaren dende la pretensión de ver ensiertu'l conocimientu específicu del asturianu nesi mesmu circuitu críticu. Y ello merez, como dixi, una reflexón posada. Como'l mio envis yera proponer esi discutiniu nun ámbitu estrictamente científicu, puedo xulgar nestos y otros llibros les carencias ya inexactitudes nos datos o la mayor o menor finura argumental, como yá fixi pero non les intenciones últimes qu'éstes o otres obres pudieren abelugar con rellación al asturianu o al discursu teóricu asturianista. Cuandoquier, partimos den de la sincera suposición de que los autores punxeron nestes obres un esencial en-fotu de rigor (llográu depués de manera desigual). De la mesma, cuento que ye importante quitarse de la zuna (demasiao afitada a veces nel asturianismu) de suponer tres de cada pequeñu renunciu un enemigu roceanu ya insidiosu. Creo que, de fechu, l'escasu aporte del asturianismu modernu a esti tipu de obres xeneralistes puede responder tanto a apriorismos y carencias de la Filoloxía Hispánica en xeneral como a problemes estructurales de la mesma investigación asturianista, que ye, otra manera, lo que más debiera esmolenos.

Un discursu científicu malamente ye a tornase dafechu de les coordenaes ideolóxiques del momentu en que s'enuncia, y nun falamos tanto d'intenciones doctrinaries sobre la llingua (que daveres esisten pero que nun tienen el más mínimo

¹ «En las particularidades del habla local se manifiesta el triple influjo del castellano, del asturiano central y del occidental. La presión dominante ha sido últimamente la del bable central», JESÚS NEIRA MARTÍNEZ, *El habla de Lena*, Oviedo (IDEA), 1955, pág. 75.

«A escasos kilómetros de la capital de la provincia [en mesmu conceyu d'Uviéu] (...) pudiera pensarse que la castellanización es pujante. Como ha de verse en las páginas que siguen, no puede hablarse de tal cosa. Hay castellanización, en efecto, pero ello no deja de ser relativo: muchos rasgos del bable persisten sin variación. Es pues una situación de contacto de lenguas de bilingüismo o diglosia» (JOSEFINA MARTÍNEZ ÁLVAREZ, *Bable y castellano en el conceyu de Oviedo*, Oviedo (Universidad de Oviedo, Archivum xvii), 1967, páxs. 7-8). El d'escribir estos ringleños nació na mesma periferia d'Uviéu al afu siguiente d'esta publicación y da fe de la validez d'estes afirmaciones, por cuantes esa misma ye la so percepción del tipu de llingua na que se socializó dende la so primer edá.

interés intelectual) como d'un tremie de supuestos asumíos colectivamente nun determináu momentu históricu. El que remanez n'obres como éstes ye'l resul-tante natural del debate sobre les llingües d'España surdiu na Transición Demo-crática, nel que, bien se conoz, el casu asturianu malapenes pasó de vese nos grandes foros como una especie d'epifénomenu acolumbráu con más o menos amabilida o desdeñu, pero siempre con menos atención de la que sí merecien otres realidaes llingüísticas periféricas. Esta circunstancia ye grave, porque de cullá de vanidaes patrioteres quita-y a la llingüística asturiana de beneficiase d'un debate críticu más ampliu qu'él que permiten los cenáculos locales, y resal más si s'atiende col pesu específico qu'está llegó a tener n'obres emblemáticas de po-quies décades atrás.

¿Qué ye, entós, lo que pasó? Nun somos tan cándidos pa desconocer circuns-tancias que, anque realmente anecdótiques, xueguen nesto ciertu papel: allá ca ún. Simplemente, y dientro d'una empresa intelectual que se quier ambiciosa, ye necesario mirar penriba d'elles, comportase como si nun esistiere y nun les usar como sida d'otrú tipu de carencias propies. Quiciabes debiera empezar per consi-derase qu'el supuestu prexuiciu que, según delles voces, conxura de contínuo con-tra l'asturianu al sur del Cordal, pudiera tar en parte retroalimentáu por otru non siempre confesu xeneráu al norte.

Seguramente nun momentu como'l de les últimes décadas, de revitalización del interés filolóxicu nel asturianu, el primet movimientu natural ye de tipu cen-trípetu: d'affitar les llindes d'una disciplina qu'aspira a consolidase dafecho como tala, a entamar dientro d'elles un programa d'investigación estremáu y autónomu, centrán de manera intensiva na realidá específica del asturianu, y hasta, inclusive, amparar roa esta xera bajo un inclín finalista mui definíu, al sen d'informar una llinia d'actuación normalizadora, en coherence cola esixencia ética de procurar la pervivencia de la llingua mesma. Darreo, ello tien inevitablemente una derivación ideolóxica, lo que nun constitui necesariamente un problema, polo que se dixo. El problema surde cuando, primero, el discursu ideolóxicu sobre la llingua acaba siendo más explícitu qu'el propiamente científico, y, sobremanera, cuando de principiu vivificador de la investigación se vuelve n'apriorismu ronciegu frente a otros llinies de trabayu encontraes n'otros intereses y presupuestos.

L'autor d'estes ringleres (que nun percibe odiu de parte de la filoloxía non asturianista) nun ta nada seguru de que la investigación asturiana moderna resalva-va intelixentemente estos dos problemas, y nun ye precisamente crítica a terceros. Entiendo qu'el discursu llingüísticu asturianu foi hasta agora más claru no tocán-

te a lo que, lexítimamente, quería faer de la llingua qu'a la d'establecer, negro sobre blanco, lo que la llingua supunxo y supón na experiencia histórica y social real de los sos falantes, y, en tou casu, esi discursu paez dacuando querer más l'anuencia interna del mesmu asturianismu qu'aceptar el retu d'integrarse (y de competir) con otres llinies (la hispanística en xeneral) que, non por distinta en cuantes a oxetu y oxetivos ye indiferente, nin tanto, a esa realidá social ya histórica del asturianu.

L'acutar el debate intelectual nun ámbitu estrechu por demás en dellos caños cuenta que truxo darreo una cierta falta de ventilación y crítica que se traduz no que, na mio opinión de primer pecador, ye una falta notable d'actualización metodolóxica. L'importante y decisivu llabor descriptivista desenvueltu nel ámbitu de la llingüística asturiana nestos años surde al abelugu de métodos d'análisis casi inalteraos nes últimes décadas, con un potencial esplicativu bramente limitáu y, de la mesma, con limitaes posibilidaes d'homologación en niveles de debate de los que sí participen con naturalidá, ensin dir más allá, el restu de les filoloxíes d'ámbitu hispánicu. Y per ende remanez una llamativa paradoxa: que s'incardinan les llinies de trabayu propies nel mesmu marcu teóricu qu'abeluga al discursu contrariu a una visión normalizada del asturianu, cuando, per otra parte, la moderna llingüística hispánica muévese en nuevos parámetros nos qu'esí tipu de discursu dexa de tener sentiu. D'aínde (percegueres particulares aparte) la escasa porosidá que muestra hacia les nueves propuestes del asturianismu.

Si amestamos a ello la falta de mecanismos claros de tresferencia de resultaos de parte de quien corresponda o una cierta galbana en cuantes a un eficaz intercambiu con investigadores foranos, poco derechu habrá depués a quexase del fuerte desconocimientu o la visión deformada que sobre la nuesa realidá llingüística s'alvierte, yá demasiaes veces, na moderna filoloxía hispánica y románica. Les dos obres reseñaes (tan distintes n'orientación y calidá) nun dexen de ser un botón de muestra más, y ello con independencia del méritu o deméritu que deba imputáse-yos a los respectivos autores y que sedrá, lóxicamente, de la so exclusiva responsabilidá personal.

XULIO VIEJO FERNÁNDEZ